

Awe nos te recorda fecha natalicio di un heroe Arubiano, Boy Ecury

BOY Ecury, kende a nace na Oranjestad riba un fecha manera awe, 23 di april 1922 a fayece na 1944 tabata un miembro di Resistencia Hulandes durante di Dos Guerra Mundial.

Nos di AWE Mainta sigur ta kere cu nos hobennan mester conoce nos heroenan y un di nan sigur ta Segundo Jorge Adelberto Ecury, kende a haya como nomber di cariño Boy.

Despues di un breve estadia na Academia Militar na Puerto Rico, hunto cu su ruman homber, Nicky, nan a ser manda pa biba na Hulanda. .

Nan tabata na Hulanda, ora cu di Dos Guerra Mundial a cuminsa na 1939 y tabata testigo di invasion di Nazi na 1940 y a mira con Rotterdam a keda destrui.

Boy a muda pa ciudad di Tilburg, unda Boy a haci amistad cu e.o. Luis de Lannoy, (q.e.p.d.), kende tabata Huez na Antiyas y asina nan a forma parti di un grupo di resistencia den dicho ciudad.

Boy Ecury hopi biaha tabata sali pa yuda esnan cu a keda herida y a bira miembro di e Consejo Resistencia na Oisterwijk. Mescos cu su coleganan Boy tabata mester bida scondi y na varios ciudad Hulandes, p'asina cumpli cu un cantidad di mision peligroso.

Algun di su coleganan a keda traiciona pa nan propio coleganan y asina a keda captura pa Nazi y un di nan tabata su amigo Luis de Lannoy, kende a keda sera y tortura na Utrecht. Boy a trata na varios ocasion di liberara su amigo Luis, pero sin exito. Mas lat, tabata Luis mes

a logra di huy for di e Nazinan.

Tabata dia 5 november 1944, despues cu Boy, a keda traiciona, a keda deteni y hiba pa un prison na Scheveningen. Aki el a wordo interroga y tortura, pasobra el a nenga di traiciona su amigonan. Un di su famoso frasenan bisa durante e tortura aki tabata: "Den cas di mi tata, no tin traidor".

Su siguiente dia, Boy Ecury a keda ehecuta pa un peloton Aleman. E tabatin 22 aña.

Su tata a trece curpa di su yiu bek for di Hulanda na 1947 y asina e por a haya un entierro cu tur honor military.

Dos aña despues a lanta un estatua na Playa, cu te awe tey ainda, p'asina duna honor y reconocimiento na un di e heroenan Arubiano. Cuarenta aña despues di su morto, Boy Ecury



a keda condecora pa Gobierno Hulandes den forma postumo.

Awe riba su fecha natalicio, nos ta spera cu Gobierno ordena pa

hisa bandera na su estatua pa tur hende sa, y puntra ta pakico y splica cu Boy Ecury tabata un di nos heroenan di Dos Guerra Mundial.